

হযবরল

সুকুমার রায়

বেজায় গরম। গাছতলায় দিব্যি ছায়ার মধ্যে চূপচাপ শূন্যে আছি, তবু ঘেমে অস্থির। ঘাসের উপর রুমালটা ছিল, ঘাম মুছবার জন্য যেই সেটা তুলতে গিয়েছি অমনি রুমালটা বলল ``ম্যাও!'' কি আপদ! রুমালটা ম্যাও করে কেন?

চেয়ে দেখি রুমাল তো আর রুমাল নেই, দিব্যি মোটা-মোটা লাল টকটকে একটা বেড়াল গাঁফ ফুলিয়ে প্যাট প্যাট করে আমার দিকে তাকিয়ে আছে!

আমি বললাম, ``কি মুশকিল! ছিল রুমাল, হয়ে গেল একটা বেড়াল।''

অমনি বেড়ালটা বলে উঠল, ``মুশকিল অবার কি? ছিল একটা ডিম, হয়ে গেল দিব্যি একটা প্যাঁকপেঁকে হাঁস। এ তো হামেশাই হচ্ছে।''

আমি খানিক ভেবে বললাম, ``তা হলে তোমায় এখন কি বলে ডাকব? তুমি তো সত্যিকারের বেড়াল নও, আসলে তুমি হচ্ছে রুমাল।''

বেড়াল বলল, ``বেড়ালও বলতে পার, রুমালও বলতে পার, চন্দ্রবিন্দুও বলতে পার।'' আমি বললাম, ``চন্দ্রবিন্দু কেন?''

শূন্যে বেড়ালটা ``তাও জানো না?'' বলে এক চোখ বুজে ফ্যাচফ্যাচ করে বিশ্রীরকম হাসতে লাগল। আমি ভারি অপ্রস্তুত হয়ে গেলাম। মনে হল, ঐ চন্দ্রবিন্দুর কথাটা নিশ্চয় আমার বোঝা উচিত ছিল। তাই খতমত থেয়ে তাড়াতাড়ি বলে ফেললাম, ``ও হ্যাঁ-হ্যাঁ, বুঝতে পেরেছি।''

বেড়ালটা খুশি হয়ে বলল, ``হ্যাঁ, এ তো বোঝাই যাচ্ছে-- চন্দ্রবিন্দুর চ, বেড়ালের তালব্য শ, রুমালের মা--- হল চশমা। কেমন, হল তো ?''

আমি কিছুই বুঝতে পারলাম না, কিন্তু পাছে বেড়ালটা আবার সেইরকম বিশ্রী করে হেসে ওঠে, তাই সঙ্গে সঙ্গে ঝুঁ-ঝুঁ করে গেলাম। তার পর বেড়ালটা খানিকক্ষণ আকাশের দিকে তাকিয়ে হঠাত্ বলে উঠল, ``গরম লাগে তো তিব্বত গেলেই পার।''

আমি বললাম, ``বলা ভারি সহজ, কিন্তু বললেই তো আর যাওয়া যায় না?''

বেড়াল বলল, ``কেন, সে আর মুশকিল কি?''

আমি বললাম, ``কি করে যেতে হয় তুমি জানো?''

বেড়াল একগাল হেসে বলল, ``তা আর জানি নে? কলকতা, ডায়মন্ডহারবার, রানাঘাট, তিব্বত, ব্যাস! সিধে রাস্তা, সওয়া ঘন্টার পথ, গেলেই হল।''

আমি বললাম, ``তা হলে রাস্তাটা আমায় বাতলে দিতে পার?''

শূন্যে বেড়ালটা হঠাত্ কেমন গম্ভীর হয়ে গেল। তার পর মাথা নেড়ে বলল, ``উঁহু, সে আমার কর্ম নয়। আমার গেছোদাদা যদি থাকত, তা হলে সে ঠিক-ঠিক বলতে পারত।''

আমি বললাম, ``গেছোদাদা কে? তিনি থাকেন কোথায়?''

বেড়াল বলল, ``গেছোদাদা আবার কোথায় থাকবে? গাছে থাকে।''

আমি বললাম, ``কোথায় গেলে তাঁর সাথে দেখা হয়?''

বেড়াল খুব জোরে মাথা নেড়ে বলল, সেটি হচ্ছে না, সে হবার জো নেই।''

আমি বললাম, ``কিরকম?''

বেড়াল বলল, ``সে কিরকম জানো? মনে কর, তুমি যখন যাবে উলুবেড়ে তাঁর সঙ্গে দেখা করতে, তখন তিনি থাকবেন মতিহারি। যদি মতিহারি যাও, তা হলে শুনবে তিনি আছেন রামকিষ্টপুর। আবার সেখানে গেলে দেখবে তিনি গেছেন কাশিমবজার। কিছুতেই দেখা হবার জো নেই।''

আমি বললাম, ``তা হলে তোমরা কি করে দেখা কর?"

বেড়াল বলল, ``সে অনেক হাসাম। আগে হিসেব করে দেখতে হবে, দাদা কোথায় কোথায় নেই; তার পর হিসেব করে দেখতে হবে, দাদা কোথায় কোথায় থাকতে পারে; তার পর দেখতে হবে, দাদা এখন কোথায় আছে। তার পর দেখতে হবে, সেই হিসেব মতো যখন সেখানে গিয়ে পৌঁছবে, তখন দাদা কোথায় থাকবে। তার পর দেখতে হবে--- "

আমি তাড়াতাড়ি বাধা দিয়ে বললাম, ``সে কিরকম হিসেব?"

বেড়াল বলল, ``সে ভারি শক্ত। দেখবে কিরকম?" এই বলে সে একটা কাঠি দিয়ে ঘাসের উপর লম্বা আঁচড় কেটে বলল, ``এই মনে কর গেছোদাদা।" বলেই খানিকক্ষণ গম্ভীর হয়ে চুপ করে বসে রইল।

তার পর আবার ঠিক তেমনি একটা আঁচড় কেটে বলল, ``এই মনে কর তুমি," বলে আবার ঘাড় বাঁকিয়ে চুপ করে রইল।

তার পর হঠাৎ আবার একটা আঁচড় কেটে বলল, ``এই মনে কর চন্দ্রবিন্দু।" এমনি করে খানিকক্ষণ কি ভাবে আর একটা করে লম্বা আঁচড় কাটে, আর বলে, ``এই মনে কর তিব্বত---" ``এই মনে কর গেছোবৌদি রান্না করছে---" ``এই মনে কর গাছের গায়ে একটা ফুটো---"

এইরকম শুনতে-শুনতে শেষটায় আমার ক্রমশ রাগ ধরে গেল। আমি বললাম, ``দূর ছাই! কি সব আবোল তাবোল বকছে, একটুও ভালো লাগে না।"

বেড়াল বলল, ``আচ্ছা, তা হলে আর একটু সহজ করে বলছি। চোখ বোজ, আমি যা বলব, মনে মনে তার হিসেব কর।" আমি চোখ বুজলাম।

চোখ বুজেই আছি, বুজেই আছি, বেড়ালের আর কোনো সাড়া-শব্দ নেই। হঠাৎ ক্রমশ সন্দেহ হল, চোখ চেয়ে দেখি বেড়ালটা ল্যাজ খাড়া করে বাগানের বেড়া টপকিয়ে পালাচ্ছে আর ক্রমাগত ক্যাচক্যাচ করে হাসছে।

কি আর করি, গাছতলায় একটা পাথরের উপর বসে পড়লাম। বসতেই কে যেন ভাঙা-ভাঙা মোটা গলায় বলে উঠল, ``সাত দুগুনে কত হয়?"

আমি ভাবলাম, এ আবার কে রে? এদিক-ওদিক তাকাচ্ছি, এমন সময় আবার সেই আওয়াজ হল, ``কই জবাব দিচ্ছ না যে? সাত দুগুনে কত হয়?" তখন উপর দিকে তাকিয়ে দেখি, একটা দাঁড়কাক প্লেট পেনসিল দিয়ে কি যেন লিখছে, আর এক-একবার ঘাড় বাঁকিয়ে আমার দিকে তাকাচ্ছে।

আমি বললাম, ``সাত দুগুনে চোন্দো।"

কাকটা অমনি দুলে-দুলে মাথা নেড়ে বলল, ``হয় নি, হয় নি, ফেল।"

আমার ভয়ানক রাগ হল। বললাম, ``নিশ্চয় হয়েছে। সাতকে সাত, সাত দুগুনে চোন্দো, তিন সাত একুশ।"

কাকটা কিছু জবাব দিল না, খালি পেনসিল মুখে দিয়ে খানিকক্ষণ কি যেন ভাবল। তার পর বলল, ``সাত দুগুনে চোন্দোর নামে চার, হাতে রইল পেনসিল!"

আমি বললাম, ``তবে যে বলছিলে সাত দুগুনে চোন্দো হয় না? এখন কেন?"

কাক বলল, ``তুমি যখন বলেছিলে, তখনো পুরো চোন্দো হয় নি। তখন ছিল, তেরো টাকা চোন্দো আনা তিন পাই। আমি যদি ঠিক সময় বুঝে ধাঁ করে ১৪ লিখে না ফেলতাম, তা হলে এতক্ষণে হয়ে যেত চোন্দো টাকা এক আনা নয় পাই।"

আমি বললাম, ``এমন আনাড়ি কথা তো কখনো শুনিনি। সাত দুগুনে যদি চোন্দো হয়, তা সে সব সময়েই চোন্দো। একঘন্টা আগে হলেও যা, দশদিন পরে হলেও তাই।"

কাকটা ভারি অবাক হয়ে বলল, ``তোমাদের দেশে সময়ের দাম নেই বুঝি?"

আমি বললাম, ``সময়ের দাম কিরকম?"

কাক বলল, ``এখানে কদিন থাকতে, তা হলে বুঝতে। আমাদের বাজারে সময় এখন ভয়ানক মাগিয়া, এতটুকু বাজে খরচ করবার জো নেই। এই তো কদিন খেটেখুটে চুরিচামারি করে খানিকটে সময় জমিয়েছিলাম, তাও তোমার সঙ্গে তর্ক করতে অর্ধেক খরচ হয়ে গেল।" বলে সে আবার হিসেব করতে লাগল। আমি অপ্রস্তুত হয়ে বসে রইলাম।

এমন সময়ে হঠাত্ গাছের একটা ফোকর থেকে কি যেন একটা সুডুত করে পিছলিয়ে মাটিতে নামল। চেয়ে দেখি, দেড় হাত লম্বা এক বুড়ো, তার পা পর্যন্ত সবুজ রঙের দাড়ি, হাতে একটা হুকো তাতে কলকে-টলকে কিছু নেই, আর মাথা ভরা টাক। টাকের উপর খড়ি দিয়ে কে যেন কি-সব লিখেছে।

বুড়ো এসেই খুব ব্যস্ত হয়ে হুকোতে দু-এক টান দিয়েই জিজ্ঞাসা করল, ``কই হিসেবটা হল?"

কাক খানিক এদিক-ওদিক তাকিয়ে বলল, এই হল বলে।"

বুড়ো বলল, ``কি আশ্চর্য ! উনিশ দিন পার হয়ে গেল, এখনো হিসেবটা হয়ে উঠল না? "

কাক দু-চার মিনিট খুব গম্ভীর হয়ে পেনসিল চুষল তার পর জিজ্ঞাসা করল, ``কতদিন বললে?"

বুড়ো বলল, ``উনিশ।"

কাক অমনি গলা উঁচিয়ে হেঁকে বলল, ``লাগ লাগ লাগ কুড়ি।"

বুড়ো বলল, ``একুশ।" কাক বলল, ``বাইশ।" বুড়ো বলল, ``তেইশ।" কাক বলল, ``সাড়ে তেইশ।" ঠিক যেন নিলেম ডাকছে।

ডাকতে-ডাকতে কাকটা হঠাত্ আমার দিকে তাকিয়ে বলল, ``তুমি ডাকছ না যে?"

আমি বললাম, ``খামকা ডাকতে যাব কেন?"

বুড়ো এতক্ষণ আমায় দেখে নি, হঠাত্ আমার আওয়াজ শুনাই সে বন্বন করে আট দশ পাক ঘুরে আমার দিকে ফিরে দাঁড়াল।

তার পরে হুকোটাকে দূরবীনের মতো করে চোখের সামনে ধরে অনেকক্ষণ আমার দিকে তাকিয়ে রইল। তার পর পকেট থেকে কয়েকখানা রঙিন কাঁচ বের করে তাই দিয়ে আমায় বার বার দেখতে লাগল। তার পর কোথেকে একটা পূরনো দরজির ফিতে এনে সে আমার মাপ নিতে শুরু করল, আর হাঁকতে লাগল, ``খাড়াই ছাব্বিশ ইঞ্চি, হাতা ছাব্বিশ ইঞ্চি, আঙ্গিন ছাব্বিশ ইঞ্চি, ছাতি ছাব্বিশ ইঞ্চি, গলা ছাব্বিশ ইঞ্চি।"

আমি ভয়ানক আপত্তি করে বললাম, ``এ হতেই পারে না। বুকুর মাপও ছাব্বিশ ইঞ্চি, গলাও ছাব্বিশ ইঞ্চি? আমি কি শূওর?"

বুড়ো বলল, ``বিশ্বাস না হয়, দেখ।"

দেখলাম ফিতের লেখা-টেখা সব উঠে গিয়েছে, খালি ২৬ লেখাটা একটু পড়া যাচ্ছে, তাই বুড়ো যা কিছু মাপে সবই ছাব্বিশ ইঞ্চি হয়ে যায়।

তার পর বুড়ো জিজ্ঞাসা করল, ``ওজন কত?"

আমি বললাম, ``জানি না!"

বুড়ো তার দুটো আঙুল দিয়ে আমায় একটুখানি টিপে-টিপে বলল, ``আড়াই সের।"

আমি বললাম, ``সেকি, পটলার ওজনই তো একুশ সের, সে আমার চাইতে দেড় বছরের ছোটো।"

কাকটা অমনি তাড়াতাড়ি বলে উঠল, ``সে তোমাদের হিসেব অন্যরকম।"

বুড়ো বলল, ``তা হলে লিখে নাও-- ওজন আড়াই সের, বয়েস সাঁইত্রিশ।"

আমি বললাম, ``দুত! আমার বয়স হল আট বছর তিনমাস, বলে কিনা সাঁইত্রিশ।"

বুড়ো খানিকক্ষণ কি যেন ভেবে জিজ্ঞাসা করল, ``বাড়তি না কমতি?"

আমি বললাম, ``সে আবার কি?"

বুড়ো বলল, ``বলি বয়েসটা এখন বাড়ছে না কমছে?''

আমি বললাম, ``বয়েস আবার কমবে কি?''

বুড়ো বলল, ``তা নয় তো কেবলই বেড়ে চলবে নাকি? তা হলেই তো গেছি! কোনদিন দেখব বয়েস বাড়তে বাড়তে একেবারে ষাট সত্তর আশি বছর পার হয়ে গেছে। শেষটায় বুড়ো হয়ে মরি আর কি!''

আমি বললাম, ``তা তো হবেই। আশি বছর বয়েস হলে মানুষ বুড়ো হবে না!''

বুড়ো বলল, ``তোমার যেমন বুদ্ধি! আশি বছর বয়েস হবে কেন? চল্লিশ বছর হলেই আমরা বয়েস ঘুরিয়ে দিই। তখন আর একচল্লিশ বেয়াল্লিশ হয় না-- উনচল্লিশ, আটত্রিশ, সাতত্রিশ করে বয়েস নামতে থাকে। এমনি করে যখন দশ পর্যন্ত নামে তখন আবার বয়েস বাড়তে দেওয়া হয়। আমার বয়েস তো কত উঠল নামল আবার উঠল, এখন আমার বয়েস হয়েছে তেরো!'' শূনে আমার ভয়ানক হাসি পেয়ে গেল।

কাক বলল, ``তোমরা একটু আস্তে আস্তে কথা কও, আমার হিসেবটা চটপট সেরে নি।''

বুড়ো অমনি চট করে আমার পাশে এসে ঠ্যাং ঝুলিয়ে বসে ফিসফিস করে বলতে লাগল, ``একটা চমতকার গল্প বলব। দাঁড়াও একটু ভেবে নি।'' এই বলে তার হুকো দিয়ে টেকো মাথা চুলকাতে-চুলকাতে চোখ বুজে ভাবতে লাগল। তার পর হঠাত বলে উঠল, ``হ্যাঁ, মনে হয়েছে, শোনো---

``তার পর এদিকে বড়োমন্ত্রী তো রাজকন্যার গুলিসূতো খেয়ে ফেলেছে। কেউ কিছু জানে না। ওদিকে রাক্ষসটা করেছে কি, ঘুমুতে-ঘুমুতে হাঁউ-মাঁউ-কাঁউ, মানুষের গন্ধ পাঁউ বলে হুড়ু মুড়ু করে খাট থেকে পড়ে গিয়েছে। অমনি ঢাক ঢোল সানাই কাঁশি লোক লঙ্কর সেপাই পল্টন হে-হে রে-রে মার-মার কাট-কাট--- এর মধ্যে রাজামশাই বলে উঠলেন, 'পক্ষীরাজ যদি হবে, তা হলে ন্যাজ নেই কেন?' শূনে পাত্র মিত্র ডাক্তার মোক্তার আক্কেল মক্কেল সবাই বললে, 'ভালো কথা! ন্যাজ কি হল?' কেউ তার জবাব দিতে পারে না, সুড়সুড় করে পালাতে লাগল।''

এমন সময় কাকটা আমার দিকে তাকিয়ে জিজ্ঞাসা করল, ``বিজ্ঞাপন পেয়েছ? হ্যাঁওবিল?''

আমি বললাম, ``কই না, কিসের বিজ্ঞাপন?'' বলতেই কাকটা একটা কাগজের বাণ্ডিল থেকে একখানা ছাপানো কাগজ বের করে আমার হাতে দিল, আমি পড়ে দেখলাম তাতে লেখা রয়েছে---

শ্রীশ্রীভূগতিকাগায় নমঃ

শ্রীকাকেশ্বর কুচুকুচে

৪১ নং গেছোবাজার, কাগোয়াপটি

আমরা হিসাবী ও বেহিসাবী খুচরা ও পাইকারী সকলপ্রকার গণনার কার্য বৈজ্ঞানিক প্রক্রিয়ায় সম্পন্ন করিয়া থাকি। মূল্য এক ইঞ্চি ১।০।

CHILDREN HALF PRICE অর্থাৎ শিশুদের অর্ধমূল্য। আপনার জুতার মাপ, গায়ের রঙ, কান কটকট করে কি না, জীবিত কি মৃত, ইত্যাদি আবশ্যিকীয় বিবরণ পাঠাইলেই ফেরত ডাকে ক্যাটালগ পাঠাইয়া থাকি।

সাবধান! সাবধান!! সাবধান!!!

আমরা সনাতন বামসবংশীয় দাঁড়িকুলীন, অর্থাৎ দাঁড়কাক। আজকাল নানাশ্রেণীর পাতিকাক, হেঁড়েকাক, রামকাক প্রভৃতি নীচশ্রেণীর কাকেরাও অর্ধলোভে নানারূপ ব্যবসা চালাইতেছে। সাবধান! তাহাদের বিজ্ঞাপনের চটক দেখিয়া প্রভারিত হইবেন না।

কাক বলল, ``কেমন হয়েছে?''

আমি বললাম, ``সবটা তো ভালো করে বোঝা গেল না।''

কাক গম্ভীর হয়ে বলল, ``হ্যাঁ, ভারি শক্ত, সকলে বুঝতে পারে না। একবার এক খন্দের এয়েছিল তার ছিল টেকো মাথা--''

এই কথা বলতেই বুড়ো মাতৃ-মাতৃ করে তেড়ে উঠে বলল, ``দেখ! ফের যদি টেকো মাথা বলবি তো হুঁকো দিয়ে এক বাড়ি মেরে তোর স্লেট ফাটিয়ে দেব।''

কাক একটু খতমত খেয়ে কি যেন ভাবল, তার পর বলল, ``টেকো নয়, টেসো মাথা, যে মাথা টিপে-টিপে টোল খেয়ে গিয়েছে।''

বুড়ো তাতেও ঠাণ্ডা হল না, বসে-বসে গজগজ করতে লাগল। তাই দেখে কাক বলল, ``হিসেবটা দেখবে নাকি?''

বুড়ো একটু নরম হয়ে বলল, ``হয়ে গেছে? কই দেখি।''

কাক অমনি ``এই দেখ'' বলে তার স্লেটখানা ঠকাস করে বুড়োর টাকের উপর ফেলে দিল। বুড়ো ততক্ষণাত মাথায় হাত দিয়ে বসে পড়ল আর ছোটো ছেলেদের মতো ঠোট ফুলিয়ে ``ও মা, ও পিসি, ও শিবুদা'' বলে হাত-পা ছুঁড়ে কাঁদতে লাগল।

কাকটা খানিকক্ষণ অবাক হয়ে তাকিয়ে, বলল, ``লাগল নাকি! ষাট-ষাট।''

বুড়ো অমনি কান্না খামিয়ে বলল, ``একষটি, বাষটি, চৌষটি--''

কাক বলল, ``পঁয়ষটি।''

আমি দেখলাম আবার বুম্বি ডাকাডাকি শুরু হয়, তাই তাড়াতাড়ি বলে উঠলাম, ``কই হিসেবটা তো দেখলে না?''

বুড়ো বলল, ``হ্যাঁ-হ্যাঁ তাই তো! কি হিসেব হল পড় দেখি।''

আমি স্লেটখানা তুলে দেখলাম ক্ষুদে-ক্ষুদে অক্ষরে লেখা রয়েছে--

``ইয়াদি কির্দ অত্র কাকালতনামা লিখিতং শ্রীকাকেশ্বর কুচকুচে কার্ষণাগে। ইমারত্ খেসারত্ দলিল দস্তাবেজ। তস্য ওয়ারিশানগণ মালিক দখলিকার সয়ে অত্র নায়েব সেরেস্তায় দস্ত বদস্ত কামেম মোকররী পত্তনীপাড়া অথবা কাওলা কবুলিয়ত। সত্যতায় কি বিনা সত্যতায় মুনসেফী আদালতে কিম্বা দায়রায় সোপর্দ আসামী ফরিয়াদী সাক্ষী সাবুদ গয়রহ মোকর্দমা দায়ের কিম্বা আপোস মকমল ডিক্রীজারী নিলাম ইস্তাহার ইত্যাদি সর্বপ্রকার কর্তব্য বিষায়--''

আমার পড়া শেষ না হতেই বুড়ো বলে উঠল, ``এ-সব কি লিখেছ আবেল তাবোল?''

কাক বলল, ``ও-সব লিখতে হয়। তা না হলে আদালতে হিসেব টিকবে কেন? ঠিক চৌকস-মতো কাজ করতে হলে গোড়ায় এ-সব বলে নিতে হয়।''

বুড়ো বলল, ``তা বেশ করেছ, কিন্তু আসল হিসেবটা কি হল তা তো বললে না?''

কাক বলল, ``হ্যাঁ, তাও তো বলা হয়েছে। ওহে, শেষ দিকটা পড় তো?''

আমি দেখলাম শেষের দিকে মোটা-মোটা অক্ষরে লেখা রয়েছে--

সাত দুগুণে ১৪, বয়স ২৬ ইক্ষি, জমা ১২ || সের, খরচ ৩৭ বতসর।

কাক বলল, ``দেখই বোঝা যাচ্ছে অক্ষটা এল-সি-এমও নয়, জি-সি-এমও নয়। সূত্রায় হয় এটা ত্রৈশিকের অঙ্ক, নাহয় ভগ্নাংশ। পরীক্ষা করে দেখলাম আড়াই সেরটা হচ্ছে ভগ্নাংশ। তা হলে বাকি তিনটে হল ত্রৈশিক। এখন আমার জানা দরকার, তোমরা ত্রৈশিক চাও না ভগ্নাংশ চাও?''

বুড়ো বলল, আচ্ছা দাঁড়াও, তা হলে একবার জিজ্ঞাসা করে নি।'' এই বলে সে নিচু হয়ে গাছের গোড়ায় মুখ ঠেকিয়ে ডাকতে লাগল, ``ওরে বুধো! বুধো রে!''

খানিক পরে মনে হল কে যেন গাছের ভিতর থেকে রেগে বলে উঠল, ``কেন ডাকছি?''

বুড়ো বলল, ``কাকেশ্বর কি বলছে শোন।''

আবার সেইরকম আওয়াজ হল, ``কি বলছে?''

বুড়ো বলল, ``বলছে, ত্রৈশিক না ভগ্নাংশ?''

তেড়ে উত্তর হল, ``কাকে বলছে ভগ্নাংশ? তোকে না আমাকে?''

বুড়ো বলল, ``তা নয়। বলছে, হিসেবটা ভগ্নাংশ চাস, না ত্রৈশিক?''

একটুক্ষণ পর জবাব শোনা গেল, ``আচ্ছা, ত্রৈশিক দিতে বল।''

বুড়ো গম্ভীরভাবে খানিকক্ষণ দাঁড়ি হাতড়াল, তার পর মাথা লেড়ে বলল, ``বুধোটোর যেমন বুদ্ধি! ত্রৈশিক দিতে বলব কেন? ভগ্নাংশটা খারাপ হল কিসে? না হে কাকেশ্বর, তুমি ভগ্নাংশই দাও।''

কাক বলল, ``তা হলে আড়াই সেরের গোটা সের দুটো বাদ গেলে রইল ভগ্নাংশ আধ সের, তোমার হিসেব হল আধ সের। আধ সের হিসেবের দাম পড়ে-- খাঁটি হলে দুটাকা চোন্দোআনা, আর জল মেশানো থাকলে ছয় পয়সা।''

বুড়ো বলল, ``আমি যখন কাঁদছিলাম, তখন তিন ফাঁটা জল হিসেবের মধ্যে পড়েছিল। এই নাও তোমার শ্লেট, আর এই নাও পয়সা ছটা।''

পয়সা পেয়ে কাকের মহাফুর্তি! সে 'টাক-ডুমাডুম টাক-ডুমাডুম' বলে শ্লেট বাজিয়ে নাচতে লাগল।

বুড়ো অমনি আবার তেড়ে উঠল, ``ফের টাক-টাক বলছিস? দাঁড়া। ওরে বুধো বুধো রে! শিগগির আয়। আবার টাক বলছে।'' বলতে-না-বলতেই গাছের ফোকর থেকে মস্ত একটা পোঁটলা মতন কি যেন হুড়মুড় করে মাটিতে গড়িয়ে পড়ল। চেয়ে দেখলাম, একটা বুড়ো লোক একটা প্রকাণ্ড বোঁচকার নীচে চাপা পড়ে ব্যস্ত হয়ে হাত-পা ছুঁড়ছে! বুড়োটা দেখতে অবিকল এই হুকোওয়াল বুড়োর মতো। হুকোওয়াল কোথায় তাকে টেনে তুলবে না সে নিজেই পোঁটলার উপর চড়ে বসে, ``ওঠ বলছি, শিগগির ওঠ'' বলে ধাঁই-ধাঁই করে তাকে হুকো দিয়ে মারতে লাগল।

কাক আমার দিকে চোখ মটকিয়ে বলল, ``ব্যাপারটা বুঝতে পারছ না? উধোর বোঝা বুধোর ঘাড়ে। এর বোঝা ওর ঘাড়ে চাপিয়ে দিয়েছে, এখন ও আর বোঝা ছাড়তে চাইবে কেন? এই নিষে রোজ মারামারি হয়।''

এই কথা বলতে-বলতেই চেয়ে দেখি, বুধো তার পোঁটলাসুদ্ধ উঠে দাঁড়িয়েছে। দাঁড়িয়েই সে পোঁটলা উঁচিয়ে দাঁত কড়মড় করে বলল, ``তবে রে ইস্টুপিড উধো!'' উধোও আঙ্গিন গুটিয়ে হুকো বাগিয়ে হুকোর দিয়ে উঠল, ``তবে রে লক্ষ্মীছাড়া বুধো!''

কাক বলল, ``লেগে যা, লেগে যা-- নারদ-নারদ!''

অমনি ঝটপট, খটখট, দমাদম, ধপাধপ! মুহূর্তের মধ্যে চেয়ে উধো চিত্তপাত শূয়ে হাঁপাচ্ছে, আর বুধো ছটফট করে টাকে হাত বুলোচ্ছে।

বুধো কান্না শুরু করল, ``ওরে ভাই উধো রে, তুই এখন কোথায় গেলি রে?''

উধো কাঁদতে লাগল, ``ওরে হায় হায়! আমাদের বুধোর কি হল রে!''

তার পর দুজনে উঠে খুব খানিক গলা জড়িয়ে কেঁদে, আর খুব খানিক কোলাকুলি করে, দিব্যি খোশমেজাজে গাছের ফোকরের মধ্যে ঢুকে পড়ল। তাই দেখে কাকটাও তার দোকানপাট বন্ধ করে কোথায় যেন চলে গেল।

আমি ভাবছি এইবেলা পথ খুঁজে বাড়ি ফেরা যাক, এমন সময় শূনি পাশেই একটা ঘোপের মধ্যে কিরকম শব্দ হচ্ছে, যেন কেউ হাসতে হাসতে আর কিছুতেই হাসি সামলাতে পারছে না। উঁকি মেরে দেখি, একটা জন্তু-- মানুষ না বাঁদর, প্যাঁচা না ভূত, ঠিক বোঝা যাচ্ছে না-- খালি হাত-পা ছুঁড়ে হাসছে, আর বলছে, ``এই গেল গেল-- নাড়ি-ভুঁড়ি সব ফেটে গেল!''

হঠাত্ত আমায় দেখে সে একটু দম পেয়ে উঠে বলল, ``ভাগ্যিস তুমি এসে পড়লে, তা না হলে আর একটু হলেই হাসতে হাসতে পেত ফেটে যাচ্ছিল।''

আমি বললাম, ``তুমি এমন সাংঘাতিক রকম হাসছ কেন?''

জঙ্কটা বলল, ``কেন হাসছি শুনবে? মনে কর, পৃথিবীটা যদি চ্যাপটা হত, আর সব জল গড়িয়ে ডাঙায় এসে এসে পড়ত, আর ডাঙার মাটি সব ঘুলিয়ে প্যাচপ্যাচে কাদা হয়ে যেত, আর লোকগুলো সব তরা মধ্যে ধপাধপ আছাড় খেয়ে পড়ত, তা হলে-- হো: হো: হো: হো--" এই বলে সে আবার হাসতে হাসতে লুটিয়ে পড়ল।

আমি বললাম, ``কি আশ্চর্য! এর জন্য তুমি এত ভয়ানক করে হাসছ?''

সে আবার হাসি খামিয়ে বলল, ``না, না, শুধু এর জন্য নয়। মনে কর, একজন লোক আসছে, তার এক হাতে কুলপিবরফ আর-এক হাতে সাজিমাটি, আর লোকটা কুলপি খেতে গিয়ে তুলে সাজিমাটি খেয়ে ফেলেছে-- হো: হো:, হো: হো, হা: হা: হা: হা--" আবার হাসির পালা।

আমি বললাম, ``কেন তুমি এই-সব অসম্ভব কথা ভেবে খামকা হেসে-হেসে কষ্ট পাচ্ছ?''

সে বলল, ``না, না, সব কি আর অসম্ভব? মনে কর, একজন লোক টিকটিকি পোষে, রোজ তাদের নাইয়ে খাইয়ে শূকোতে দেয়, একদিন একটা রামছাগল এসে সব টিকটিকি খেয়ে ফেলেছে-- হো: হো: হো: হো--"

জঙ্কটার রকম-সকম দেখে আমার ভারি অদ্ভুত লাগল। আমি জিজ্ঞাসা করলাম, ``তুমি কে? তোমার নাম কি?''

সে খানিকক্ষণ ভেবে বলল, ``আমার নাম হিজি বিজ্ বিজ্। আমার নাম হিজি বিজ্ বিজ্, আমার ভায়ের নাম হিজি বিজ্ বিজ্, আমার বাবার নাম হিজি বিজ্ বিজ্, আমার পিসের নাম হিজি বিজ্ বিজ্--"

আমি বললাম, ``তার চেয়ে সোজা বললেই হয় তোমার গুণ্ডিসুদ্ধ সবাই হিজি বিজ্ বিজ্।''

সে আবার খানিক ভেবে বলল, ``তা তো নয়, আমার নাম তকাই! আমার মামার নাম তকাই, আমার খুড়ের নাম তকাই, আমার মেসোর নাম তকাই, আমার স্বশুরের নাম তকাই--"

আমি ধমক দিয়ে বললাম, ``সত্যি বলছ? না বানিয়ে?''

জঙ্কটা কেমন খতমত খেয়ে বলল, ``না না, আমার স্বশুরের নাম বিস্কুট।''

আমার ভয়ানক রাগ হল, ভেড়ে বললাম, ``একটা কথাও বিশ্বাস করি না।''

অমনি কথা নেই বার্তা নেই, ঝোপের আড়াল থেকে একটা মস্ত দাড়িওয়ালা ছাগল হঠাত্ উঁকি মেয়ে জিজ্ঞাসা করল, ``আমার কথা হচ্ছে বুঝি?''

আমি বলতে যাচ্ছিলাম `না' কিন্তু কিছু না বলতেই তড়তড় করে সে বলে যেতে লাগল, ``তা তোমরা যতই তর্ক কর, এমন অনেক জিনিস আছে যা ছাগলে খায় না। তাই আমি একটা বক্তৃতা দিতে চাই, তার বিষয় হচ্ছে-- ছাগলে কি না খায়।'' এই বলে সে হঠাত্ এগিয়ে এসে বক্তৃতা আরম্ভ করল--

``হে বালকবন্দ এবং গ্লোহের হিজি বিজ্ বিজ্, আমার গলায় ঝোলানো সার্টিফিকেট দেখেই তোমরা বুঝতে পারছ যে আমার নাম শ্রী ব্যাকরণ শিং বি. এ. খাদ্যবিশারদ। আমি খুব চমতকার ব্যা করতে পারি, তাই আমার নাম ব্যাকরণ, আর শিং তো দেখতেই পাছ। ইংরাজিতে লিখবার সময় লিখি B.A. অর্থাৎ ব্যা। কোন-কোন জিনিস খাওয়া যায় আর কোনটা-কোনটা খাওয়া যায় না, তা আমি সব নিজে পরীক্ষা করে দেখেছি, তাই আমার উপাধি হচ্ছে খাদ্যবিশারদ। তোমরা যে বল-- পাগলে কি না বলে, ছাগলে কি না খায়-- এটা অত্যন্ত অন্যায়। এই তো একটু আগে ঐ হতভাগাটা বলছিল যে রামছাগল টিকটিকি খায়! এটা একেবারে সম্পূর্ণ মিথ্যা কথা। আমি অনেকরকম টিকটিকি চেটে দেখেছি, ওতে খাবার মতো কিছু নেই। অবশ্য আমরা মাঝে-মাঝে এমন অনেক জিনিস খাই, যা তোমরা খাও না, যেমন-- খাবারের ঠোঙা, কিশ্বা নারকেলের ছোবড়া, কিশ্বা খবরের কাগজ, কিশ্বা সন্দেশের মতো ভালো ভালো মাসিক পত্রিকা। কিন্তু তা বলে মজবুত বাঁধানো কোনো বই আমরা কক্ষনো খাই না। আমরা কচিৎ কখনো লেপ কঞ্চল কিশ্বা ভোষক বালিশ এ-সব একটু আধটু খাই বটে, কিন্তু যারা বলে আমরা খাট পালং কিশ্বা টেবিল চেয়ার খাই, তারা ভয়ানক মিথ্যাবাদী। যখন আমাদের মনে খুব তেজ আসে, তখন শখ করে অনেকরকম জিনিস আমরা চিবিয়ে কিশ্বা চেখে দেখি, যেমন, পেনসিল রবার কিশ্বা বোতলের ছিপি কিশ্বা শুকনো জুতো কিশ্বা ক্যামবিসের ব্যাগ। শুনছি আমরা ঠাকুরদাদা একবার ফুর্তির চোটে এক সাহেবের আধখানা তাঁবু প্রায় খেয়ে শেষ করেছিলেন। কিন্তু তা বলে ছুরি কাঁচি কিশ্বা শিশি-বোতল, এ-সব আমরা কোনোদিন খাই না। কেউ-কেউ সাবান খেতে ভালোবাসে, কিন্তু সে-সব নেহাত ছোটোখাটো বাজে সাবান। আমার ছোটোভাই একবার একটা আস্ত বার্ন-সোপ খেয়ে ফেলেছিল--" বলেই ব্যাকরণ শিং আকাশের দিকে চোখ তুলে ব্যা-ব্যা করে ভয়ানক কাঁদতে লাগল। তাতে বুঝতে পারলাম যে সাবান খেয়ে ভাইটির অকালমৃত্যু হয়েছিল।

হিজি বিজ্ বিজ্টা এতক্ষণ পড়ে পড়ে ঘুমোচ্ছিল, হঠাত্ ছাগলটার বিকট কান্না শূনে সে হাঁউ-মাঁউ করে ধড়মড়িয়ে উঠে বিষম-টিম্বম খেয়ে একেবারে অস্থির! আমি ভাবলাম

বোকাটা বৃষ্টি মরে এবার! কিন্তু একটু পরেই দেখি, সে আবার তেমনি হাত-পা ছুঁড়ে ফ্যাকফ্যাক করে হাসতে লেগেছে।

আমি বললাম, ``এর মধ্যে আবার হাসবার কি হল ?''

সে বলল, ``সেই একজন লোক ছিল, সে মাঝে-মাঝে এমন ভয়ংকর নাক ডাকাত যে সবাই তার উপর চটা ছিল! একদিন তাদের বাড়ি বাজ পড়েছে, আর অমনি সবাই দৌড়ে তাকে দমাদম মারতে লেগেছে-- হোঃ হোঃ হোঃ হো--'' আমি বললাম, ``যত-সব বাজে কথা।'' এই বলে যেই ফিরতে গেছি, অমনি চেয়ে দেখি একটা নেড়ামাথা কে-বেন যাত্রার জুড়ির মতো চাপকান আর পায়জামা পরে হাসি-হাসি মুখ করে আমার দিকে তাকিয়ে আছে। দেখে আমার গা স্বলে গেল। আমায় ফিরতে দেখেই সে আবদার করে আহ্লাদীর মতো ঘাড় বাঁকিয়ে দুহাত নেড়ে বলতে লাগল, ``না ভাই, না ভাই, এখন আমায় গাইতে বোলো না। সত্যি বলছি, আজকে আমার গলা তেমন খুলবে না।''

আমি বললাম, ``কি আপদ! কে তোমায় গাইতে বলছে ?''

লোকটা এমন বেহায়া, সে তবুও আমার কানের কাছে ঘ্যানঘ্যান করতে লাগল, ``রাগ করলে ? হ্যাঁ ভাই, রাগ করলে ? আচ্ছা নাহয় কয়েকটা গান শুনিয়ে দিচ্ছি, রাগ করবার দরকার কি ভাই ?''

আমি কিছু বলবার আগেই ছাগলটা আর হিজি বিজি বিজটা একসঙ্গে চোঁচিয়ে উঠল, ``হ্যাঁ-হ্যাঁ-হ্যাঁ, গান হোক, গান হোক।'' অমনি নেড়াটা তার পকেট থেকে মস্ত দুই তাড়া গানের কাগজ বার করে, সেগুলো চোখের কাছে নিয়ে গুনগুন করতে করতে হঠাৎ সবু গলায় চীৎকার করে গান ধরল-- ``লাল গানে নীল সুর, হাসি হাসি গন্ধ।''

ঐ একটিমাত্র পদ সে একবার গাইল, দুবার গাইল, পাঁচবার, দশবার গাইল।

আমি বললাম, ``এ তো ভারি উভপাত দেখছি, গানের কি আর কোনো পদ নেই ?''

নেড়া বলল, ``হ্যাঁ আছে, কিন্তু সেটা অন্য একটা গান। সেটা হচ্ছে-- অলিগলি চলি রাম, ফুটপাথে ধুমধাম, কালি দিয়ে চুনকাম। সে গান আজকাল আমি গাই না। আরেকটা গান আছে-- নাইনিতালের নতুন আলু-- সেটা খুব নরম সুরে গাইতে হয়। সেটাও আজকাল গাইতে পারি না। আজকাল যেটা গাই, সেটা হচ্ছে শিখিপাথার গান।'' এই বলে সে গান ধরল--

শিখিপাথা শিখিপাথা আকাশের কানে কানে
শিশি বোতল ছিপিচাকা সবু সবু গানে গানে
আলাভোলা বাঁকা আলো আধো আধো কতদূরে,
সবু মোটা সাদা কালো ছলছল ছায়াসুরে।

আমি বললাম, ``এ আবার গান হল নাকি ? এর তো মাথামুণ্ডু কোনো মানেই হয় না।''

হিজি বিজি বিজ বলল, ``হ্যাঁ, গানটা ভারি শক্ত।''

ছাগল বলল, ``শক্ত আবার কোথায় ? ঐ শিশি বোতলের জামগাটা একটু শক্ত ঠেকল, তা ছাড়া তো শক্ত কিছু পেলাম না।''

নেড়াটা খুব অভিমান করে বলল, ``তা, তোমরা সহজ গান শুনতে চাও তো সে কথা বললেই হয়। অত কথা শোনার দরকার কি ? আমি কি আর সহজ গান গাইতে পারি না ?'' এই বলে সে গান ধরল--

বাদুড় বলে, ওরে ও ভাই সজারু,
আজকে রাতে দেখবে একটা মজারু।

আমি বললাম, ``মজারু বলে কোনো-একটা কথা হয় না।''

নেড়া বলল, ``কেন হবে না-- আলবত হয়। সজারু কপারু দেবদারু সব হতে পারে, মজারু কেন হবে না ?''

ছাগল বলল, ``ততক্ষণ গানটা চলুক-না, হয় কি না হয় পরে দেখা যাবে।'' অমনি আবার গান শুরু হল--

বাদুড় বলে, ওরে ও ভাই সজারু,
আজকে রাতে দেখবে একটা মজারু।
আজকে হেথায় চাম্‌চিকে আর পেঁচার
আসবে সবাই, মরবে ইঁদুর বেচার।
কাঁপবে ভয়ে ব্যাঙগুলো আর ব্যাঙাচি,
ঘামতে ঘামতে ফুটেবে তাদের ঘামাচি,
ছুটেবে ছুঁচো লাগবে দাঁতে কপাটি,
দেখবে তখন ছিশ্বি ছ্যাঙা চপাটি।

আমি আবার আপত্তি করতে যাচ্ছিলাম, কিন্তু সামলে গেলাম। গান আবার চলতে লাগল,

সজারু কয়, ঝোপের মাঝে এখনি
গিন্নী আমার ঘুম দিয়েছেন দেখ নি ?
এনে রাখুন প্যাঁচা এবং প্যাঁচানি,
ভাঙলে সে ঘুম শূনে তাদের চ্যাঁচানি,
খ্যাংরা-খ্যাঁচা করব তাদের খুঁচিয়ে--
এই কথাটা বলবে তুমি বুঝিয়ে।
বাদুড় বলে, পেঁচার কুটুম কুটুমী,
মানবে না কেউ তোমার এ-সব ঘুঁতুমি।
ঘুমোয় কি কেউ এমন ভূসো আঁধারে ?
গিন্নী তোমার হাঁতলা এবং হাঁদাড়ে।
তুমিও দাদা হচ্ছ ক্রমে থ্যাঁপাটে
চিমনি-চাটা ভোঁপসা-মুখো ভ্যাঁপাটে।

গানটা আরো চলত কি না জানি না, কিন্তু এইপর্যন্ত হতেই একটা গোলমাল শোনা গেল। তাকিয়ে দেখি আমার আশেপাশে চারদিকে ভিড় জমে গিয়েছে। একটা সজারু এগিয়ে বসে
কোঁত কোঁত করে কাঁদছে আর একটা শামলাপরা কুমির মস্ত একটা বই নিয়ে আস্তে-আস্তে তার পিঠ খাবড়াচ্ছে আর ফিস্‌ফিস্‌ করে বলছে, ``কেঁদো না, কেঁদো না, সব ঠিক করে
দিচ্ছি।'' হঠাত্‌ একটা ভকমা-আঁটা পাগড়ি-বাঁধা কোলাব্যাঙ ব্ল উঁচিয়ে চীতকার করে বলে উঠল-- ``মানহানির মোকদ্দমা।''

অমনি কোথেকে একটা কালো ঝোলপা-পরা হুতোমপ্যাঁচা এসে সকলের সামনে একটা উঁচু পাথরের উপর বসেই চোখ বুজে ঢুলতে লাগল, আর একটা মস্ত ছুঁচো একটা বিস্ত্রী নোংরা
হাতপাখা দিয়ে তাকে বাতাস করতে লাগল।

প্যাঁচা একবার ঘোলা-ঘোলা চোখ করে চারদিকে তাকিয়েই তক্ষুনি আবার চোখ বুজে বলল, ``নালিশ বাতলাও।''

বলতেই কুমিরটা অনেক কষ্টে কাঁদো-কাঁদো মুখ করে চোখের মধ্যে নখ দিয়ে খিমচিয়ে পাঁচ ছয় কোঁটা জল বার করে ফেলল। তার পর সর্দিবসা মোটা গলায় বলতে লাগল,
``ধর্মাবতার হুজুর! এটা মানহানির মোকদ্দমা। সুতরাং প্রথমেই বুঝতে হবে মান কাকে বলে। মান মানে কচু। কচু অতি উপদেয় জিনিস। কচু অনেকপ্রকার, যথা-- মানকচু,
ওলকচু, কান্দাকচু, মুখিকচু, পানিকচু, শঙ্খকচু, ইত্যাদি। কচুগাছের মূলকে কচু বলে, সুতরাং বিষয়টার একেবারে মূল পর্যন্ত যাওয়া দরকার।''

এইটুকু বলতেই একটা শেয়াল শামলা মাখায় তড়াঙ্ করে লাকিয়ে উঠে বলল, ``হুজুর, কচু অতি অসার জিনিস। কচু খেলে গলা কুটকুট করে, কচুপোড়া খাও বললে মানুষ চটে
মায়। কচু খায় কারা? কচু খায় শূওর আর সজারু। ওয়াক্‌ খুঃ।'' সজারুটা আবার ফ্যাঁত্‌ফ্যাঁত্‌ করে কাঁদতে যাচ্ছিল, কিন্তু কুমির সেই প্রকাণ্ড বই দিয়ে তার মাখায় এক খাবড়া
মেরে জিত্তাসা করল, ``দলিলপত্র সাক্ষী-সাব্দ কিছু আছে?'' সজারু নেড়ার দিকে তাকিয়ে বলল, ``ঐ তো ওর হাতে সব দলিল রয়েছে।'' বলতেই কুমিরটা নেড়ার কাছ থেকে
একতড়া গানের কাগজ কেড়ে নিয়ে হঠাত্‌ এক জায়গা থেকে পড়তে লাগল--

একের পিঠে দুই গোলাপ চাঁপা ভুঁই সান্ বাঁধানো ভুঁই
টোকি ডেপে শুই ইলিশ মাগুর রুই গোবর জলে ধুই
পোঁটলা বেঁধে খুই হিন্‌চে পালং পুই কাঁদিস কেন ভুই।

সজারু বলল, ``আহা ওটা কেন? ওটা তো নয়।'' কুমির বলল, ``তাই নাকি? আচ্ছা দাঁড়াও।'' এই বলে সে আবার একখানা কাগজ নিয়ে পড়তে লাগল--

চাঁদনি রাতের পেতনীপিসি সজনেতলায় খোঁজ না রে--
খাঁতলা মাথা হ্যাংলা সেখা হাড় কচাক্‌ ভোজ মারে।

চালতা গাছে আলতা পরা নাক ঝুলানো শাঁখচুনি
 মাকড়ি নেড়ে হাঁকড়ে বলে, আমায় তো কেঁউ তাঁকছ নি!
 মুগু ঝোলা উল্টোবুড়ি ঝুলছে দেখ চুল খুলে,
 বলছে দুলে, মিনসেগুলোর মাংস খাব তুলতুলে।

সজারু বলল, ``দূর ছাই! কি যে পড়ছে তার নেই ঠিক।''

কুমির বলল, ``তাহলে কোনটা, এইটা?-- দই দম্বল, টেকো অম্বল, কাঁথা কম্বল করে সম্বল বোকা ভোম্বল-- এটাও নয়? আচ্ছা তা হলে দাঁড়াও দেখছি-- নিঝুম নিশুত রাতে, একা শূয়ে তেতলাতে, খালি খালি খিদে পায় কেন রে?-- কি বললে?-- ও-সব নয়? তোমার গিল্লীর নামে কবিতা?-- তা সে কথা আগে বললেই হত। এই তো-- রামভজনের গিল্লীটা, বাপ রে যেন সিংহীটা! বাসন নাড়ে ঝনারঝন, কাপড় কাচে দমান্দম।-- এটাও মিলছে না? তা হলে নিশ্চয় এটা--

খুসখুসে কাশি ঘুসঘুসে স্বর, ফুসফুসে ছাঁদা বুড়ো তুই মর।
 মাজরাতে ব্যথা পঁজরাতে বাত, আজ রাতে বুড়ো হবি কুপোকাত!''

সজারুটা ভয়ানক কাঁদতে লাগল, ``হায়, হায়! আমার পয়সাগুলো সব জলে গেল! কোথাকার এক আহাম্মক উকিল, দলিল খুঁজে পায় না!''

নেড়াটা এতক্ষণ আড়ষ্ট হয়ে ছিল, সে হঠাত বলে উঠল, ``কোনটা শুনতে চাও? সেই যে-- বাদুড় বলে ওরে ও ভাই সজারু-- সেইটে?''

সজারু ব্যস্ত হয়ে বলল, ``হ্যাঁ-হ্যাঁ, সেইটে, সেইটে।''

অমনি শেয়াল আবার তেড়ে উঠল, ``বাদুড় কি বলে? হুজুর, তা হলে বাদুড়গোপালকে সাক্ষী মানতে আজ্ঞা হোক।''

কোলাব্যায়ু গাল-গলা ফুলিয়ে হাঁকে বলল, ``বাদুড়গোপাল হাজির?''

সবাই এদিক-ওদিক তাকিয়ে দেখল, কোথাও বাদুড় নেই। তখন শেয়াল বলল, ``তা হলে হুজুর, ওদের সঙ্কলের ফাঁসির হুকুম হোক।''

কুমির বলল, ``তা কেন? এখন আমরা আপিল করব?''

প্যাঁচা চোখ বুজে বলল, ``আপিল চলুক! সাক্ষী আন।''

কুমির এদিক-ওদিক তাকিয়ে হিজি বিজ্ বিজ্কে জিজ্ঞাসা করল, ``সাক্ষী দিবি? চার আনা পয়সা পাবি।'' পয়সার নামে হিজি বিজ্ বিজ্ তড়াক করে সাক্ষী দিতে উঠেই ফ্যাকফ্যাক করে হেসে ফেলল।

শেয়াল বলল, ``হাসছ কেন?''

হিজি বিজ্ বিজ্ বলল, ``একজনকে শিথিয়ে দিয়েছিল, তুই সাক্ষী দিবি যে, বইটার সবুজ রঙের মলাট, কানের কাছে নীল চামড়া আর মাথার উপর লালকালির ছাপ। উকিল যেই তাকে জিজ্ঞাসা করেছে, তুমি আসামীকে চেন? অমনি সে বলে উঠেছে, আজে হ্যাঁ, সবুজ রঙের মলাট, কানের কাছে নীল চামড়া, মাথার উপর লালকালির ছাপ-- হোঃ হোঃ হোঃ হো--''

শেয়াল জিজ্ঞাসা করল, ``তুমি সজারুকে চেন?''

হিজি বিজ্ বিজ্ বলল, ``হ্যাঁ, সজারু চিনি, কুমির চিনি, সব চিনি। সজারু গর্তে থাকে, তার গায়ে লম্বা-লম্বা কাঁটা, আর কুমিরের গায়ে চাকা-চাকা টিপির মতো, তারা ছাগল-টাগল ধরে খায়।'' বলতেই ব্যাকরণ শিং ব্যা-ব্যা করে ভয়ানক কেঁদে উঠল।

আমি বললাম, ``আবার কি হল?''

ছাগল বলল, ``আমার সেজোমামার আধখানা কুমিরে খেয়েছিল, তাই বাকি আধখানা মরে গেল।''

আমি বললাম, ``গেল তো গেল, আপদ গেল। তুমি এখন চুস কর।''

শেয়াল জিজ্ঞাসা করল, ``তুমি মোকদ্দমার কিছূ জানো?''

হিজি বিজ্ বিজ্ বলল, ``তা আর জানি নে? একজন নালিশ করে তার একজন উকিল থাকে, আর একজনকে আসাম থেকে ধরে নিয়ে আসে, তাকে বলে আসামী। তারও একজন উকিল থাকে। এক-একদিকে দশজন করে সাক্ষী থাকে! আর একজন জজ থাকে, সে বসে-বসে ঘুমায়।''

প্যাঁচা বলল, ``কক্ষনো আমি ঘুমোচ্ছি না, আমার চোখে ব্যারাম আছে তাই চোখ বুজে আছি।''

হিজি বিজ্ বিজ্ বলল, ``আরো অনেক জজ দেখেছি, তাদের সকলেরই চোখে ব্যারাম।'' বলেই সে ফ্যাক্ফ্যাক্ করে ভয়ানক হাসতে লাগল।

শেয়াল বলল, ``আবার কি হল?''

হিজি বিজ্ বিজ্ বলল, ``একজনের মাথার ব্যারাম ছিল, সে সব জিনিসের নামকরণ করত। তার জুতোর নাম ছিল অবিমুখ্যকারিতা, তার ছাতার নাম ছিল প্রত্যুতপন্নমতিত্ব, তার গাড়ুর নাম ছিল পরমকল্যাণবরেমু-- কিন্তু যেই তার বাড়ির নাম দিয়েছে কিংকর্তব্যবিমূঢ় অমনি ভূমিকম্প হয়ে বাড়িটাড়ি সব পড়ে গিয়েছে। হোঃ হোঃ হোঃ হো--''

শেয়াল বলল, ``বটে? তোমার নাম কি শুনি?''

সে বলল, ``এখন আমার নাম হিজি বিজ্ বিজ্।''

শেয়াল বলল, ``নমের আবার এখন আর তখন কি?''

হিজি বিজ্ বিজ্ বলল, ``তাও জানো না? সকালে আমার নাম থাকে আলুনারকোল আবার আর একটু বিকেল হলেই আমার নাম হয়ে যাবে রামতাজু।''

শেয়াল বলল, ``নিবাস কোথায়?''

হিজি বিজ্ বিজ্ বলল, ``কার কথা বলছ? শ্রীনিবাস? শ্রীনিবাস দেশে চলে গিয়েছে।'' অমনি ভিড়ের মধ্যে থেকে উধো আর বুধো একসঙ্গে টেঁচিয়ে উঠল, ``তা হলে শ্রীনিবাস নিশ্চয়ই মরে গিয়েছে!''

উধো বলল, ``দেশে গেলেই লোকেরা সব হুমহুম করে করে মরে যায়।''

বুধো বলল, ``হাব্বুলের কাকা যেই দেশে গেল অমনি শুনি সে মরে গিয়েছে।''

শেয়াল বলল, ``আঃ, সবাই মিলে কথা বোলো না, ভারি গোলমাল হয়।''

শুনে উধো বুধোকে বলল, ``ফের সবাই মিলে কথা বলবি তো তোকে মারতে মারতে সাবাড় করে ফেলব।'' বুধো বলল, ``আবার যদি গোলমাল করিস তা হলে তোকে ধরে একেবারে পেঁটলা-পেটা করে দেব।''

শেয়াল বলল, ``হুজুর, এরা সব পাগল আর আহাম্মক, এদের সাক্ষীর কোনো মূল্য নেই।''

শুনে কুমির রেগে ল্যাজ আছড়িয়ে বলল, ``কে বলল মূল্য নেই? দস্তুরমতো চার আনা পয়সা খরচ করে সাক্ষী দেওয়ানো হচ্ছে।'' বলেই সে তক্ষুনি ঠকঠক করে ষোলোটা পয়সা গুণে হিজি বিজ্ বিজের হাতে দিয়ে দিল।

অমনি কে যেন ওপর থেকে বলে উঠল, ``১নং সাক্ষী, নগদ হিসাব, মূল্য চার আনা।'' চেয়ে দেখলাম কাক্বেশ্বর বসে-বসে হিসেব লিখছে।

শেয়াল আবার জিজ্ঞাসা করল, ``তুমি এ বিষয়ে আর কিছু জানো কি-না?''

হিজি বিজ্ বিজ্ খানিক ভেবে বলল, ``শেয়ালের বিষয়ে একটা গান আছে, সেইটা জানি।''

শেয়াল বলল, ``কি গান শুনি?''

হিজি বিজ্ বিজ্ সুর করে বলতে লাগল, ``আয়, আয়, আয়, শেয়ালে বেগুন খায়, তারা তেল আর নুন কোথায় পায়--''

বলতেই শেয়াল ভয়ানক ব্যস্ত হয়ে উঠল, ``খাক-খাক, সে অন্য শেয়ালের কথা, তোমার সাক্ষী দেওয়া শেষ হয়ে গিয়েছে।''

এদিকে হয়েছে কি, সাক্ষীর পয়সা পাচ্ছে দেখে সাক্ষী দেবার জন্য ভয়ানক হুড়োহুড়ি লেগে গিয়েছে। সবাই মিলে ঠেলাঠেলি করছে, এমন সময় হঠাত্ দেখি কাকেশ্বর খুপ করে গাছ থেকে নেমে এসে সাক্ষীর জায়গায় বসে সাক্ষী দিতে আরম্ভ করেছে। কেউ কিছু জিজ্ঞাসা করবার আগেই সে বলতে আরম্ভ করল, ``শ্রীশ্রীতুশুতীকায় নমঃ। শ্রীকাকেশ্বর কুচকুচে, ৪১নং গেছোবাজার, কাগোয়াপটি। আমরা হিসাবী ও বেহিসাবী খুচরা পাইকারী সকলপ্রকার গণনার কার্য--''

শেয়াল বলল, ``বাজে কথা বোলো না, যা জিজ্ঞাসা করছি তার জবাব দাও। কি নাম তোমার?''

কাক বলল, ``কি আপদ! তাই তো বলছিলাম-- শ্রীকাকেশ্বর কুচকুচে।''

শেয়াল বলল, ``নিবাস কোথায়?''

কাক বলল, ``বললাম যে কাগোয়াপটি।''

শেয়াল বলল, ``সে এখান থেকে কতদূর?''

কাক বলল, ``তা বলা ভারি শক্ত। ঘন্টা হিসেবে চার আনা, মাইল হিসাবে দশ পয়সা, নগদ দিলে দুই পয়সা কম। যোগ করলে দশ আনা, বিয়োগ করলে তিন আনা, ভাগ করলে সাত পয়সা, গুণ করলে একশ টাকা।''

শেয়াল বলল, ``আর বিদ্যে জাহির করতে হবে না। জিজ্ঞাসা করি, তোমার বাড়ি যাবার পথটা চেন তো?''

কাক বলল, ``তা আর চিনি নে? এই তো সামনেই সোজা পথ দেখা যাচ্ছে।''

শেয়াল বলল, ``এ-পথ কতদূর গিয়েছে?''

কাক বলল, ``পথ আবার কোথায় যাবে? যেখানকার পথ সেখানেই আছে। পথ কি আবার এদিক-ওদিক চরে বেড়ায়? না, দার্জিলিঙে হাওয়া খেতে যায়?''

শেয়াল বলল, ``তুমি তো ভারি বেয়াদব হে! বলি, সাক্ষী দিতে যে এয়েছ, মোকদ্দমার কথা কি জানো?''

কাক বলল, ``খুব যা হোক! এতক্ষণ বসে-বসে হিসেব করল কে? যা কিছু জানতে চাও আমার কাছে পাবে। এই তো প্রথমেই, মান কাকে বলে? মান মানে কচুরি। কচুরি চারপ্রকার-- হিঙে কচুরি, খাস্তা কচুরি নিমকি আর জিবেগজা! খেলে কি হয়? খেলে শেয়ালদের গলা কুটকুট করে, কিন্তু কাগোদের করে না। তার পর একজন সাক্ষী ছিল, নগদ মূল্য চার আনা, সে আসামে থাকত, তার কানের চামড়া নীল হয়ে গেল-- তাকে বলে কালাস্বর। তার পর একজন লোক ছিল সে সকলের নামকরণ করত-- শেয়ালকে বলত তেলচোরা, কুমিরকে বলত অষ্টাবক্র, প্যাঁচাকে বলত বিত্তীষণ--'' বলতেই বিচার সভায় একটা ভয়ানক গোলমাল বেধে গেল। কুমির হঠাত্ খেপে গিয়ে টপ করে কোলাব্যাঙকে খেয়ে ফেলল, তাই দেখে হুঁচোটো কিচ কিচ কিচ করে ভয়ানক চাঁচাতে লাগল, শেয়াল একটা ছাতা দিয়ে হুস হুস করে কাকেশ্বরকে তাড়াতে লাগল।

প্যাঁচা গম্ভীর হয়ে বলল, ``সবাই চুপ কর, আমি মোকদ্দমার রায় দেব।'' এই বলেই কাল-কলম-দেওয়া খরগোশকে হুকুম করল, ``যা বলছি লিখে নাও: মানহানির মোকদ্দমা, চব্বিশ নম্বর। ফরিয়াদী-- সজারু। আসামী--দাঁড়াও। আসামী কই?'' তখন সবাই বল, ``ঐ যা! আসামী তো কেউ নেই।'' তাড়াতাড়ি তুলিয়ে-ভালিয়ে নেড়াকে আসামী দাঁড় করানো হল। নেড়াটা বোকা, সে ভাবল আসামীরাও বুঝি পয়সা পাবে, তাই সে কোনো আপত্তি করল না।

হুকুম হল-- নেড়ার তিনমাস জেল আর সাতদিনের ফাঁসি। আমি সবে ভাবছি এরকম অন্যায় বিচারের বিরুদ্ধে আপত্তি করা উচিত, এমন সময় ছাগলটা হঠাত্ ``ব্যা-করণ শিং'' বলে পিছন থেকে তেড়ে এসে আমায় এক টুঁ মারল, তার পরেই আমার কান কামড়ে দিল। অমনি চারদিকে কিরকম সব ঘুলিয়ে যেতে লাগল, ছাগলটার মুখটা ক্রমে বদলিয়ে শেষটায় ঠিক মেজোমামার মতো হয়ে গেল। তখন ঠাওর করে দেখলাম, মেজোমামা আমার কান ধরে বলছেন, ``ব্যাকরণ শিখবার নাম করে বুঝি পড়ে-পড়ে ঘুমোনো হচ্ছে?''

আমি তো অবাক! প্রথমে ভাবলাম বুঝি এতক্ষণ স্বপ্ন দেখছিলাম। কিন্তু, তোমরা বললে বিশ্বাস করবে না, আমার রুমালটা খুঁজতে গিয়ে দেখি কোথাও রুমাল নেই, আর একটা বেড়াল বেড়ার ওপর বসে বসে গাঁফে তা দিচ্ছিল, হঠাত্ আমায় দেখতে পেয়েই খচমচ করে নেমে পালিয়ে গেল। আর ঠিক সেই সময়ে বাগানের পিছন থেকে একটা ছাগল ব্যা করে ডেকে উঠল।

আমি বড়োমামার কাছে এ-সব কথা বলেছিলাম, কিন্তু বড়োমামা বললেন, ``যা, যা, কতগুলো বাজে স্বপ্ন দেখে তাই নিয়ে গল্প করতে এসেছে।'' মানুষের বয়স হলে এমন হাঁতকা

হযে য়ায়, কিছুতেই কোনো কথা বিশ্বাস করতে চায় না। তোমাদের কিনা এখনো বেশি বয়স হয়নি, তাই তোমাদের কাছে ভরসা করে এ-সব কথা বললাম।

সন্দেশ-- জেঠ্যা-ভাদ্র, ১৩২৯